

Siunnersuut uunga: Inatsisartunut Naalackersuisunullu il.il. ilaasortat aningaasarsiaqartitaanerat il.il. pillugit Inatsisartut inatsisaata allanngortinneqarneranik Inatsisartut inatsisaat nr. xx, uu. qqqq 2016-imeersoq.

Saqqummiussissut

(Naalackersuisut Siulittaasuat)

Siullermeerneqarnera

Naalackersuisut aamma Inatsisartut Siulittaasoqarfiat sinnerlugit matumuuna Inatsisartunut Naalackersuisunullu il.il. ilaasortat aningaasarsiaqartitaanerat il.il. pillugit Inatsisartut inatsisaata allanngortinneqarneranik Inatsisartut inatsisissaannut siunnersuut saqqummiutissavara.

2015-imi upernaakkut ataatsimiinnermi Inatsisartut Naalackersuisut peqqaat kingusinnerpaamik UPA 2016-imut Inatsisartunut Naalackersuisunullu il.il. ilaasortat aningaasarsiaqartitaanerat il.il. pillugit Inatsisartut inatsisaata allanngortinneqarnissaanut siunnersuummik saqqummiussaqaqqullugit, taamaalilluni Inatsisartunut ilaasortat aatsaat aningaasarsiaqartussanngorlugit ullormit qinersivimmiit, taamatullu aamma Naalackersuisunut ilaasortat aatsaat aningaasarsiaqartussanngorlugit ullormit Naalackersuisunut ivertinneqarnerannit.

Inatsisissatut siunnersuutikkut matumuuna inatsisartut aalajangernerat taanna timitalerneqarpoq. Siunnersuut Naalackersuisunit Inatsisartut Siulittaasoqarfiat peqatigalugu saqqummiunneqarpoq.

Malittarisassat atuuttut malillugit Inatsisartunut ilaasortaq aningaasarsiaqalerlunilu aningaasartuutitut tapisiaqartinneqalertarpoq qaammatip ilaasortap qinigaanerata akuerineqarfiata aallaqqaataaniit. Ilaasortap allap toqunera Inatsisartunilluunniit tunuavinnera pissutigalugu ilaasortanngortoqarpat, pineqartoq qaammatip toquffiusup tunuarfiusulluunniip aallaqqaataaniit aningaasarsiaqartinneqassaaq.

Inatsisissatut siunnersuutikkut piffissap aningaasarsiaqarfiusup aallartittarnera allanngortinneqassaaq. Taamaalilluni siunnersuutigineqarpoq Inatsisartunut ilaasortaq ullormit qinigaaffimminiit aningaasarsiaqartinneqalerlunilu aningaasartuutitut tapisiaqartinneqartalissasoq, taamatullu aamma ilaasortaq, ilaasortap allap toqukkut qimagunnera Inatsisartunilluunniit tunuavinnera pissutigalugu ilaasortanngortoq, ullormiit ivertinneqarfimminiit aningaasarsiaqartinneqartalissasoq.

Malittarisassat atuuttut malillugit Inatsisartut siulittaasuat, Naalakkersuisut siulittaasuat Naalakkersuisunullu ilaasortat aningaasarsiaqartinneqartarput qaammatip naalakkersuisunut qinigaaffimmik aallartinneraniit.

Inatsisissatut siunnersuutikkut piffissap aningaasarsiaqarfiusup aallartittarnera allangortineqassaaq. Taamaalilluni siunnersuutigineqarpoq Inatsisartut siulittaasuat, Naalakkersuisut siulittaasuat Naalakkersuisunullu ilaasortat aningaasarsiaqartinneqartalissasut ullormit atuuffimminnut ivertinneqarfimminniit.

Taamatut oqaaseqarlunga Naalakkersuisut Inatsisartullu Siulittaasoqarfiat sinnerlugit siunnersuut Inatsisartunut oqaluuserisassanngortippara.